

تصميم
الغلاف
هو
أحد
أركان
النجاح

قصة
بالعامية

بالتاريخ

محمد سید اکبر
کاتب علی قد حاله

ليلة الدخلة

(قصة بالعامية)

بقلم /

محمد سيد الأكرت

كاتب على قد حاله

قصتي مع الزواج ، كنت ملهوف جدا على الجواز ، خاصة بعد قصص الحب الفاشلة اللي انا مريت بيها ، بعدها قررت اني لازم اتجوز في اسرع وقت ممكن ، بس لازم يكون اختياري سليم ، بحيث اني اختار زوجة محترمة تكون سند ليا ، وفي نفس الوقت تكون جميلة مش شرط باهرة الجمال ، بس تكون مقبولة ، ع الاقل لما اصحى من النوم ملاقيش ام الشعور في وشي اتلبش واقطع الخلف ، وكانت النتيجة ان ربنا رزقني ببنت الحلال جميلة ، محترمة ، مثقفة ، متواضعة جدااا ، متفاهمه ، طبعا انا ملحقتش اعرف عيوب لان فترة الخطوبة كانت قصيرة جدا ، وبعدها كتب الكتاب والزفاف ع طول ، يوم جميل كله حيوية ، بتشوف حب الناس ليك وفرحتهم بجوازك ، بتلاقي وقفت الصحاب ، وقفة من حديد ، طلعت شقتي مع عروستي ، طبعا انا في الدور الثاني ، ومش محتاج اقولكم اني اتحمصت وشيلتها واتقطع نفسي بعدها ، رمتها ع السرير ، قصدي نزلتها بكل شياكة ع السرير رغم اني كنت عايز أرميها رمي ، بعد يوم النهاردة العريس بيكون زي الفواعلي بالظبط زي مايكون بيشغل في المعمار فحت وردم ، خرجت انا بعدها وغيرت واخذت دوش وهي كمان اخدت دوش ، وطبعا كعادة في كل المصريين ، اهل العروسة بيكونوا تحت منتظرين البشارة ويتطمنوا ع بنتهم ، والحمد لله تم الموضوع بسلام ودي كانت اغرب حاجة حصلت في اليوم ، وازاي حصلت ، بعدها قعدت انا وهيا قدام التلفزيون شوية وقعدنا في البلكونة شوية ، وبعدها دخلنا ننام ، حسيت براحة غريبة جوايا ، مكنتش مصدق ان جوازة صالونات زي ما بيقولوا هتكون كدة ، لقيت فيها حبيبتني اللي ياما حلفت اني مش هتجوز بعدها ، لقيت فيها صاحب ، ورفيق الدرب ، لقيت فيها الحنية والامان ، استغربت ، وقلت ان دة ممكن يكون بسبب بداية كل شيء ، لكن تاكدت ان الموضوع مش كدة خالص ، بس قلت لنفسني عيش لحظتك الحلوة ومتضيعش فرحتك بسبب تساؤلات ملهاش اي لازمة ، وبالفعل كانت هيا لسه منامتش ، " خديجة " نطقت اسمها وانا برفع رجلي علشان اطلع ع السرير ، لكن فجأة حسيت بكمية حزن رهيبه ، حسيت بأن دموعي ع وشك الانفجار لكن فيه حاجة منعها من الهطول ، قربت منها واخذتها في حضني ، كانت مدياني زهرها ، ماخذتش بالها من تعابير وشي ، حمدت ربنا ، حطيت ايدي ع وسطها ، وكنت مقرب جدا منها ، حسيت براحة ، يمكن يكون هوا دة الدفى اللي بسمع عنه ، غمضت عيني ، بس معرفش ليه خطر في بالي موضوع السحر ليلة الدخلة واللي بيحصل في اليوم دة ، كنت بسمع عن واحدة عملت عمل لواحد علشان هيا كانت بتحبه واتجوز غيرها ، ووحد عمل سحر لواحدة علشان كانت بتحبه واهلها غصبوها ع العريس ، كنت بسمع ان في اليوم دة بيحصل

هوايل ، المسحور ببشوف مراته بشكل مخيف ، او هيا ممكن تشوفه بشكل عفريت او غوريلا ، وكثير من الحكايات لكن انا لحد دلوقتي مشوفتش معايا ولا مع غيري ، لكن سالت نفسي سؤال ، هوا ممكن يحصل معايا كدة ، وقتها رديت ع نفسي بصوت عالي وقلت :-

التفت زوجتي وردت وقالت :

-فيه حاجة يا حبيبي

اول ما وقعت عيني عليها قمت مفزوع من مكاني ووقعت ع الارض ، اللي ردت عليا مكنتش مراتي ، لا صوتها ولا شكلها ، فضلت قاعد ع الارض خايف ارفع عيني ، استعذت بالله من الشيطان الرجيم ، وبطئ شديد بدات ارفع عيني ناحيتها ، لكن كانت المفاجأة ان مراتي نايمة مصحيتش من اساسه ، بقيت مذهول ، محتار ، خايف ، مش عارف اعمل ايه اجري وانزل ع تحت ، واقول لبتوع البيت ، ولا اصبر ، اقنعت نفسي ان دة كله بسبب ارهاق اليوم واني بفكر اصلا في الموضوع قبل ما يحصل بثواني ، قمت مسكت المصحف ، فتحتة ع اية الكرسي قراتها ومشيت لحد السرير وانا مرعوب من فكرة ان الموضوع يتكرر ثاني ، بس بدات اعمل نفسي مش واخد بالي وفضلت افكر في اللي حصل طول اليوم من حاجات حلوة ، واتخيل وانا بزق لدة ، ودي بتقول يا بختها اللي هتخدك ، ودي تبص وتتمنى زبي ، ودي ودي ، لحد ما قربت منها ثاني بس محضنتهاش المرة دي اكتفيت باني اقرب بس ، وبدات احاول انام ، ادبت ضهري لمراتي ، وايدي تحت خدي ، وسرحت في عالم ثاني ، بس هاجس الخوف مسابنيش فجأة لقيت ايد اتمدت وحضنتني ، عرفت انها مراتي ، اطمنت ثاني انها صحيت ، محبتش ابص علشان وشي كان باين عليه الفزع ، بدات تتحسس شفايفي باصبعها وانا حاسس بشعور جميل بصراحة ، لكن حسيت بملمس غريب ، وقعت عيني ع ايدها ، في نفس الوقت لقيتها بتقولى - مبسوط -

كانت شيطانة بكل معنى الكلمة ، وشها ملوش معالم ، وشها اسود ، من غير عيون ، وايدها من غير جلد والعضم محروق ، وقتها مقدرتش حتي اصرخ ، بس مكنش فيه مفر من اني ابكي وبكيت ، فجأة اختفت خالص ، وانا قمت مشيت لحد ركن الاوضة وقعدت مكاني مذهول بدور ع اي حد موجود ، مش ممكن يكون مقلب ، فجأة سمعت صوت حد يبكي بحرقة ، وسامع صوت لطم ع الخدود ، وشق هودوم ، الصوت جاي من تحت السرير ، رجلي مش قادرة تنصاع للامر وتتحرك ، بصعوبة بتحرك ناحية

السريـر ، عينيـن بتتنقل من مراتي اللي نايمة ومش حاسة بحاجة ، وبين رجل السريـر اللي حاسس ان عليها ايد حد ، وصلت للسريـر ، لكن خايف انزل اشوف مين اللي بيبكي ، استجمعت اللي باقي جوايا وقررت اني لازم اشوف مين اللي بيبكي ، ميلت اشوف وايدي وكل حثة في جسمي بتترعش ، بصيت تحت السريـر ، ملقتش حد قبل ما ارفع راسي لقيت حد واقف قدامي رفعت عيني لفوق وقلت :
- أنتي

آخر حد كنت أتوقع أني الاقيه قدامي ، كانت الحب القديم أول حب ليا ، واصدق حب عشته في حياتي ، نسيت كل الخوف اللي جوايا وقتها ووقفت قدمها وسالتها :
- انتي جيتي هنا ازاي وبتعملي ايه ...؟

-مش مهم جيت ازاي اما بقى بعمل ايه هنا ، فدة سؤال مش منطقي خالص
مكنتش دي هدير اللي حبتها ولا في يوم عشقت برائتها ، كانت واحدة تانية خالص ، واحدة الشر يبطل من عنيتها ، سرحت بعقلي بعيد في اول يوم شوفتها فيه ، كانت ملاك بمعنى الكلمة ، فجأة صرخت في وشي وقالت:

-لو كنت فاكـر اني هسيبك بعد اللي عملته فيا تبقى غلطان ، بعد حبي ليك تبعني بالرخيص ، وعلشان مين ، علشان واحدة جريانة زي دي.

صوتها كان عالي لدرجة اني استغربت جدا ازاي مراتي مصحيتش بعد كل دة ، بطرف عيني بصيت على مراتي وهيا نايمة وانا كل دة ببيحصلي وهيا ولا هنا ، غريبة ، لكن فجأة ملقتش " هدير " اختفت ، ورجع من تاني صوت البكى ، بس المرة دي ، كان اقوى من المرة اللي قبلها ، و المرة دي جاي من الدولاب ، والغريبة انه صوت رجولي ، والاغرب انه مش غريب عني المرة دي ، والمصيبة ان الصوت متقدرش متسمعوش ، فيه حاجة تشدك ، بالفعل قربت من الدولاب وفتحت اول ضلفة ملقتش حد ، تاني ضلفة ملقتش حد ، تالت ضلفة ، وساعتها مقدرتش اقف على رجلي ، لان اللي كان موجود بيبكي.....

هوا انا!!!!!!!!!!!!!!!!!!!!!!

وقعت ع الارض وزحفت لحد موصلت للحيطه ، اما بالنسبة لشبيهي فبصلي ببطئ وهوا بيعيط ، لقيته بعدها مسح دموعه وقالى :

-تفتكر هاخرج من اللي انا فيه دة ، تفتكر هتسييني في حالي ، تفتكر هاقدر اكمل مع مراتي بعد
اللي حصل دة.

!!!!!!-

مفيش اي رد مني طبعاً ، غير الذهول والخوف ، بس هوا كمل :

-طول عمري فرحتي مكسورة ، حتى فرحتي بمراتي ، اللي فكرت اني هلاقي راحتني معاها بعد كل
دة ، ليه متكنش هيا سبب اللعنة دي ، او متكنش هيا اصلاً مسحورة .. مش يمكن تكون هيا اصلاً ورا
كل اللعبة دي ، بس عاملة مش واخدة بالها ، مش يمكن توب البراءة اللي لابساه دة مش حقيقي.
مش قادر اسمع ولا كلمة منه ، صعب اوي انك تلاقي نفسك بتوهم نفسك بوهم مش موجود اصلاً ، لو
سلمت نفسي لكل دة مش هاقدر اعيش حتى لو انتهت الليلة دي ع خير ، فجأة جت عيني في عينه ،
فضل باصص عليا بتركيز شديد ، وبدون سبب ابتسم ، واتحولت الابتسامة لضحكة عالية ، انا اترعبت
جداً ، لدرجة اني دفنت وشي في كف ايدي وغمضت عيني ، بعدها بثواني رفعت عيني على نفس
المكان ، ملقنوش ، اختفى ، كان شيئاً لم يكن ، فضلت قاعد مكاني ، يمكن حاجة تاني تحصل ،
بتلفت في الدقيقة ٣٦٠ مرة ، كل دة ومراتي " خديجة " نائمة ومش دارية باي حاجة ، وقتها قررت
اني هصلي ركعتين لله ، يمكن يكون دة شيطان ، يمكن محسود ، والحسد مذكور في القرآن ، طبعاً كله
هيقول بعد كل دة ، ومفكر ان الموضوع بسيط ، هقولك صدقني ، وقتها انت بتبقى مش عايز تقنع نفسك
ان الموضوع خطير فعلاً ، بتبقى مش مستوعب انك كائن عادي ممكن يحصل معاك زي اللي بتسمع
عنه بيحصل للاخرين ، مكنتش تتوقع انك تكون من الاخرين اللي بيحصل معاهم العجب والغرائب ،
وانا كنت من ضمن الاخرين للأسف ، اتحركت فوراً للحمام ، استنجيت بسرعة ، ووقفت اتوضى ،
بصيت في المراية ، ببص لنفسي ، حاسس اني مش انا ، حاسس اني متغير ، سنين متغيرش الواحد ،
وتيجي لحظة تغير منك وفيك كثير ، بصيت في المراية بتأمل حالي ، مسكت الحنفية فتحتها ، لسه
هتوضى وحصل اغرب حاجة ممكن اتوقعها ، الحنفية بتطلع دم!!!!!!

قبل ما افوق من الصدمة دي كانت الصدمة الثانية اقوى بكثير ، انك تكون في الحمام الساعة واحدة
ونص بالليل ، وتلاقي كائن مربع واقف وراك ، كائن انا لو حاولت اوصفه ابقى متواضع جداً في حق
نفسي ، معرفش اذا كانت شيطانة ، ولا واحدة ميتة من سنين ومدفونة في قبر كان في الاساس مقلب
زبالة ، ودة لان ريحتها كانت فوق المقرزة بملايين المرات ، كنت هبكي لكن ملقنوش دموع تنزل وكانها

هربت من بشاعة المنظر علشان اكون فيه انا لوحدي ، حطت اديها على كتفي وبتتحسس جسمي لحد ما وصلت عند رقبتي ، كل دة وانا باصص في المراية براقب كل اللي بيحصل من غير حتى ما افكر في الهرب ، مش شجاعة ، لا... دة لاني مبقاش عندي القدرة حتى اني اهرب لو فيه مجال ، قربت مني اوي ، وبلسانها المشقوق نصين بتلحس ودني ، غمضت عنيا ، وهيا مستمرة في اللي بتعمله ، فجأة وقفت كل حاجة ، وبعدت عني ، فتحت عيني ، بصيت في المرايا ملقتش حد ، قررت الف بربقبي اتأكد أكثر فجأة ظهرت قدامي من العدم ، لكن حسيت بان هيئتها بتتغير تدريجيا ، احساسني باني عايز ادخل الحمام بدأ يزيد بس ادخل فين تاني وانا اصلا في الحمام ، طب استأذن منها تمشي لحد ما اخلص وترجع تاني ، ايوة بس دي عفريته ممكن تشوفك عادي وتعمل انها مشيت ، افكار غريبة وعبيطة جت في بالي وقتها ، وانا واقف متنح مفيش اي تعبير ظاهر على وشي ، غير البلاهة ، بس التعبير دة اتشال ، واتحط مكانه تعبير الجنون ، والخوف والفزع ، والقلق ، دة غير الذكريات ، الماضي السحيق ، تدعيس في ماضيك هتلاقي حاجات تشيب ، وفعلًا بعد كل الموضوع دة بسنة انا جزء من شعري ابيض بسبب الموقف دة ، ملامحها اكتملت قدامي ، وبقت انسانة طبيعية جدا جدا ، إنسانة جميلة ، برئية ، تتحب ، لطيفة ، وفيها حنية الدنيا والاخرة ، فيها براءة طفل لسه يا دوب سنتين ، إنسانة كانت ضحية من ضحاياي ، إنسانة كنت أنا ... كنت ... كنت أنا السبب في موتها ، إنسانة ك.....

-إفتكرت ...؟ ولا عايزني أفكر ..؟-

قالت الجملة دي ودموعها كانت بتنزل على الارض زي المطر ، إنك تحاول تهرب من الماضي ، وتلاقيه متمسك بيك وبيقولك مهما تحاول تتغير ، إستحالة هسيبك تتغير ، يا إما تكفر عن اللي بتعمله ، او تستمر على النهج اللي كنت ماشي عليه علشان تقابل ربنا بذنوبك ومعاصيك من غير توبة ، ساعتها انا مقدرتش اتكلم ، كل اللي جه في بالي وقتها ، هوا يوم الحادثة .

-مريم ، اية رأيك تيجي تسهري معانا النهاردة واهو تغييري جو بدل الكآبة دي.

-ومين قالك يا " عمرو " إنني مكتنبة اصلا ، صدقني لما بكون معاك والله ببقى في قمة سعادتي ، تعرف انك لما بتكون جمبي بلاقي ابتسامه على شفايفي كدة طول الوقت معرفش اصلا اية سببها ، ولما بتيجي في بالي والله.

-جميل كلامك ، بس دة يخليني اتأكد من ثقتك فيا ، ولا اية ؟

-اممم ، هتجيبها من ناحية الثقة ، ماشي ، بس انت عارف اني بثق في نفسي اوي ، وانت نفسي يا عمرو.

-طيب يبقى تيجي النهاردة معايا ونتقابل ع الشلة.

-ماشي

روحنا يومها اتقابلنا في شقة في الهرم ، بحجة عيد الميلاد بتاع " تمارا " وطبعاً مش محتاج اقول ان " تمارا " اصلاً هيا الشمال نفسه ، اتفقت مع تمارا انها هتخط في العصير بتاع مريم مخدر ، المخدر دة بيقوم بتفكيك اعصاب الشخص ، تثير شهوته - اسف على اللفظ - وبالفعل تم الموضوع ، بعد ماشربت العصير ، كانت ولا اجدعها عاهرة في نادي من نوادي شارع الهرم ، حاولت المسها رفضت ، لسه فيه مقاومة ، ودة مش لان المخدر معملش مفعوله ، لا ، البنت العفيفة فعلاً ، لو حتى نايمة او في غيبوبة ، لما بتكون رافضة فعل مخل بحيائها ، بتفضل متمسكة باحترامها ، حتى لو كانت نايمة وبتحلم ، لو حلمت بحلم مخل ، او بلفظ قبيح ، بتقوم من النوم مزاجها مش مظبوط ، بتقوم من النوم عصبية ، رغم ان الموضوع عادي ودة حلم ، بس هيا بتحس بانتهاك لاخلاقها ، واحترامها ، بعد فترة من الملاحظة الخفيفة ، استسلمت تماماً ، لكن الغريبة انها وقتها كانت بتبكي ، رغم ان الاستمتاع واضح عليها ، انتهيها من كل دة ، وبدأ مفعول المخدر يروح ، قامت من على السرير ، ومكنتش استعادت وعيها كاملاً ، بعد فترة من التخطب ، فاقت ورجعت لوعيها ، اول ما شافت نفسها في المرايا ، صرخت ، صرخة واحدة ، واول ما دورت دورت عليا انا ، وبعيون مليانة دموع ، وفي حالة ذهول ، وصرع ، قالت لي :

-انت عملت ايه ، منك لله ، منك لله ، هوا دة جزائي ، منكو لله

كلنا ادينا زهرنا ليها ، الظاهر ان احنا كمان فوقنا من الغيبوبة ، بس كان فات الاوان ، سمعنا صوت الشباك بيتفتح وهيا طالعة هترمي نفسها من الشباك ، بس قبل ما تنزل عنيتها متعلقة بيا ، وقالت :

-عيش حياتك ، بس هتلاقيني ديما معاك يا سبب بسمتي .

معرفش ليه وقتها حسيت انتهت هتموت ومش هتموت ، طبعاً مش محتاج ادخل في تفاصيل الحادثة وايه اللي حصل بعدها ، بس اللي حصل سهل انكم تتوقعوه ، بس بعدها وانا حياتي اتغيرت ٣٦٠ درجة ، ودة العادي فينا ، اننا مش بنتغير ، غير بعد فوات الاوان ، يا أما نخسر حد ويموت ، او

نفارق حد غالي علينا ، المهم ان التغيير مجاش في الوقت المناسب ، وديما الوقت المناسب مش بيبجي اصلا في وقته.

-انتي موتي ، انتي مش حقيقة.

-انا مت اه ، بالنسبة لكل الناس ، اما بالنسبة ليك انت فانا ممتش من جواك .

-عايزة مني اية يا مريم ..؟ انا خلاص توبت لربنا وعايز ابدأ حياة جديدة ، وذنك في رقبتني ليوم

الدين وان كانت توبتي بجد ربنا هيسامحني ، وهيعوضك ، ارجوكي سبيني اعيش حياتي.

-وانا لما حبيتك واستأمنتك على حياتي كلها ، لما أمنتك وصدقتك ووثقت فيك يا نفسي ، لما بعنتي

لشوية كلاب ، وقطعته في لحمي كلكم ، لما مستحملش اني اعيش بعار انا مليش ذنب فيه وانتحر ،

تفتكر اللي بينتحر ربنا بيسامحه ، كدة انا في النار ، يبقى لازم انت كمان تبقى معايا يا روجي.

فجأة لقتها اتحولت تاني ، بقت ابشع من الاول ، لدرجة اني محستش بنفسي وانا بعملها على روجي

من كتر الخوف ، لفت اديها حوالين رقبتني ، بدأت احس ان الدنيا خلاص مبقتش بتاعتي ، وان

خلاص هروح معاها ، لكن فجأة اختفت من قدامي ، لما باب الحمام خبطت ، فتحت بسرعة لقيت

” خديجة ” واقفة قدام الباب ، ملقتش قدامي غير اني اترمي في حضنها وانا بعيطت زي عيل صغير

وبقولها :

-مريم عايزة تنتقم مني يا ” خديجة ”

-تنتقم منك ليه يا حبيبي

استغربت من رد فعل مراتي وقتها ، مكنش المفروض ترد كدة ، كان المفروض والبديهي تقول :

-مين مريم دي اللي بتتكلم عنها .

وانا لسه في حضنها قتلتها :

-انتي مش خديجة

بصوت هرب قلبي لما سمعه :

-انا مريم يا نفسي.

-ابعدي عني

زقتها بعيد عني بقوة ، لكن هيا متحركتش من مكانها انا اللي يعتبر اتزقيت وبقوة كمان ، فضلت لازق في الحيطه كاني ملزوق بغراء ، اما هيا فكانت الابتسامه ع وشها ، بس ابتسامه شر ، فجأة شميت ريحة حاجة بتتحرق ، بس المصيبة الكبرى ان الريحة طالعة من انفي انا ، وبدأت احس ان جسمي زي ما يكون جواة بركان ، عرق غزير بينزل على عيني لدرجة اني مبقتش شايف بوضوح ، والافظع من كدة هيا ، اه هيا ، هيا كمان كانت بتتحرق ، قدام عنيا ، بس الغريب انها كانت بتضحك

!!!!!!!!!!!!!!!!!!!!!!

مقدرتش استحمل كل دة ، محستش بنفسي وانا بقع على الارض فاقد الوعي ، وعلى صوت مراتي " خديجة " صحيت وهيا بتقومني وهيا ملهوفة عليا الصبح لما لقتني مرمي قدام باب الحمام ، جسمي كان مش على بعضه ، فضلت اتلفت شمال ويمين ، مش مصدق ان اللي واقفة قدامي دي مراتي ، بس بعد فترة بسيطة استوعبت كل حاجة ، اتأكدت فعلا ان دي مراتي ، قمت بتسند عليها ، لحد ما وصلت على السرير ، سالتني ايه اللي حصلك ، مالك في ايه ، مكنش عندي غير رد واحد هوا اني كنت مرهق من يوم امبارح ، وكان عندي شوية هبوط ، ومرضتش اصحيكي او اقلقك لاني عارف انك تعبانة حسيت انها مقتنعتش باي كلمة اصلا ، بس لو انا في العادي بتاعي هاعرف انها اقتنعت ، لاني مراتي من النوع اللي مش بيجب يشوف اللي بين الكلام او معندهاش فكرة بين السطور دي ، المهم اليوم عدى طبيعي جدا ، وانا مستغرب ازاي دة حصل ، معقول ، طبعا مش هتكلم عن يوم الصباحية ، وازاي تعبتي اوي في اليوم دة علشان اضغط على نفسي واظهر بشكل عادي جدا ، كنت خايف لحد يلاحظ حاجة لكن الحمد لله ، محدش حس بحاجة خالص ، بعدها طلعت فوق في الشقة ع الساعة ٦ المغرب كدة ، كنت جعان بطريقة فظيعة ، طلبت من خديجة تحضرلي اكل ، قامت فعلا تحضر الاكل ، وانا قعدت قدام التلفزيون شوية ، بس مكنتش باصص عليه ، كنت مشغله بس سرحان في كل حاجة حصلت امبارح ، لما اليوم عدى النهاردة طبيعي قولت يبقى اكيد انا اللي كنت مش مظبوط ، وبعدين هوا فيه حد يفكر في السحر والشعوذة يوم دخلته ، ايه القرف دة ، معرفش ليه حسيت اني بضحك على نفسي باي كلام ، وفي نفس الوقت كنت متأكد فعلا ان كل دة هلاوس من عقلي الباطن ، ام العقل الباطن دة اللي محدش عارف لامة ملة من الاساس ، ناديت على خديجة مسمعتش روحت داخل على المطبخ ، لقتها واقفة لسه بتجهز ، دخلت براحة ، وزى افلام السيما حضنتها ، وقلت :

-وحشتيني

-انت لازم تعترف انك غلطت ، وانك اذنبت ، وذنبتك مش صغير ، لأ ، دة ذنب عظيم كمان ، مجرد اعترافك بالذنب نص التوبة ، انك تحاول تكفر عنه دي النص الثاني من التوبة .

-ايوة انا فعلا بحاول اكفر.....

-لا .. انت محاولتش ، انت تجاهلت اللي فات ، مجرد احساسك بالذنب ، وانك تعيش حياتك بعدها عادي من غير اي تغيير جذري في حياتك يبقى دة مش تكفير ، لازم تعرف انت عملت ايه ، ولازم تعمل ايه .

-وانا مش عارف اعمل ايه .

-الاول لازم تعرف ان اي حد هيساعدك فدة مش لانه قادر على المساعدة ، لا .. دة لان ربنا هوا اللي قدر ليك وليه انه يساعدك ، وان من غير ربنا مفيش حاجة هتم .

-ونعم بالله يا معetz ، انا عايز اتغير واتوب ، بس اخرج من المشكلة دي الاول .

-لا .. كل حاجة بالتوازي ، يعني تتوب ، وفي نفس الوقت تدور على حل للمشكلة ، مش كدة احسن برده ، لانك لو حليت مشكلتك قبل التوبة ، هتبقى مش متعود على التوبة ، وهترجع تاني لنفس الوضع ، يمكن اسوأ من الاول كمان ، لانك وقعت في مشكلة واتحلت فاية المانع اني استمر طالما بتتحل . لكن لما تتعود على طريق الصلاح هتلاقي نفسك اتعودت عليه ، ومش هتقدر تغير طريقك ابدًا .

-وانا ربنا شاهد على نيتي يا " معetz " بس لو في ايدك حل قولني عليه .

-متقلقش .. وسيبها على ربنا .

مشيت معاه لحد بيته ، طلعتا فوق ، قعدنا بيجي ساعة ، وبعدها ، قالي يلا تعالى معايا ، قولتله على فين ، قالي بس تعالى معايا وان شاء الله محلولة .

بعد بيته ب٣ شوارع دخلنا في بيت قديم شوية ، بس فيه حاجة مريحة ، معرفش ايه هيا ، شعور محبب بيغزو قلبك كدة ، بصلي وابتسم ، استغربت ، وكملنا لحد ما طلعتا الدور الثالث ، خبطت على باب الشقة ، من قبل الباب ما يتفتح ، سمعنا حد بيقول :

-حمدالله بالسلامة يا " معetz "

عرف منين انه معetz ، فتح الباب ، وكان راجل كبير في السن ، حوالي ٧٠ كدة ، اول ما شافنا ابتسم ، معetz ميل على ايده وحبها ، والراجل بص عليا وضحك وهو ابيقول :

-ادخل يا " عمرو "

عمرو!!!!!!!!!!!!!! ، عرف اسمي منين ، بصيت على معتز لقيته بيبتسم ، ايه الناس الغريبة اللي كلها ابتسامات ، دة اعلان لمعجون اسنان ولا اية دة اللي دار في عقلي وقتها معرفش ايه الافكار اللي بتيجي في بالي دي ، برده الراجل بص عليا وابتسم وقال :

-لا مش اعلان لمعجون اسنان.

الذهول كان متواضع قدام شعوري ، الحيرة والجنون ، وال ... واية تاني مش عارف ، لسه هتكلم قال يا اعد يا عمرو .

قعدت على الكنبه اللي في نص الصالة ، ودخل هوا و " معتز " جوا ، بعدها بخمس دقائق طلع معتز بصنية الشاي ، والراجل الغريب دة من وراه ، قعد قدام مني على الكنبه اللي في وشي ، وقال :

-ربنامش ببذلك علشان ترجعله ، لأ .. ربنا بيدوقك مرارة الذنوب علشان تعرف حلاوة القرب منه فتقرب ليه .

اية دة هما على موجة واحدة ولا اية ، اول جملة خطرت في بالي ، لكن الراجل ضحك وقال :

-لا مش على موجة واحدة يا عمرو يابني.

كنت هاعتذر بس ملقتش كلام اقوله ، قلت لنفسى وهوا ليه يتصنت عليا ويسمع بفكر في ايه ، رد هوا وقال :

-اعتذارك مقبول.

انك تتحكم في افكارك قدام حد بيقرا افكارك دة شيء مستحيل ، انت الحاجة بتخطر في بالك وبعدها بتفكر فيها ، لقيت نفسي بقول في عقلي برده ، هوا انت جاييني هنا يا معتز علشان تجنني اكثر. نفس الضحكة ، بس من غير رد ، الراجل كان وجهه بشوش لدرجة لا توصف بيته كان بسيط جدا جدا ، فيه حاجة حلوة الراجل دة ، زي ما بيقولوا كدة فيه شيء لله ، حتى ضحكته مكنتش عالية اوي ، بالنسبة لاي حد تاني دة كدة بيبتسم ، فجأة لقيته حط الكوباية على الصنية وقال :

-احكي يابني ، وقبل ما تنطق اعرف ان ربنا عالم بيك من قبل حتى ما تتخلق ، وانه معاك مش سايبك.

وحكيت لثاني مرة وانا مش عارف ايه فايده اني احكي وهوا طالما بيقرا الافكار ، بعد ما خلصت ، سألته :

-لكن انت مين ...؟

-انا عبد من عباد الله يا بني

-كلنا من عباد الله يا حج

-بس ياريت كلنا نتأكد من اننا عباد الله ، ازاى واحنا فينا المغرور والمتكبر ، والعاصي ، واللي ناسي ان ربنا موجود.

الحكمة في كلمه حسستني بني قليل وي ، واني فعلا معرفش حجة عن ديني غير يادوب لا اله الا الله محمد رسول الله ، وشوية حركات بعملها في الصلاة وكام سورة ، عرفت اني اتلهيت عن ربنا كثير ، اتلهيت في الفيس ، والواتس ، واني اعرف دي ، واني اكسب رهان مع دة وان لما فكرت ابدأ حياة جديدة مبداتهاش صح .

فجأة لقيته سكت وغمض عنيه ، وشفافيه بتتحرك بسرعة غريبة جدا ، وطول شوية قرابة الربع ساعة ، والغريبة بقى انه بكى ، بكى بحرقة ، وكأنه بيعيط على حد مات ، لكن بعدها عرفت انه بيعيط من خشية ربنا سبحانه وتعالى ، اكيد مكنتش هاعرف في وقتها ، وانا اصلا عمري ما دمعت دمة لربنا ، قعد يستغفر ربنا كثير ، يستغفر ويبيكي ، وكل شوية صوته في البكى يعلى ، بعد كدة سكت خالص ، فجأة فتح عنيه وبص عليا وقالى :

-روح بيتك يا عمرو يا بني .

-ايوة بس انا قو.....

-كل علة لها سبب ، ولكل سبب مسبب ، والمسبب حي لا يموت .

-ونعم بالله يا حج بس ان....

رد معتز عليا وقال :

-الشيخ محمد سليمان لما يقولك روح بيتك يبقى روح بيتك

خرجت من عنده من غير ولا كلمة تانية ، ومعتز فضل قاعد معاه ، اللي عرفته بعدها ، من معتز هوا الحوار اللي دار بينهم ، لما انا مشيت ، معتز سال الشيخ محمد وقاله :

-انت عرفت العلة يا شيخ محمد

-عرفتها .. بس هوا لازم يدوق مرارة الذنب علشان يعرف يتوب.

-تقصد انه هيل.....

-دع الملك للمالك يا بني .

وصلت انا البيت بعدها ، ودخلت وانا متطمئن من ان مفيش حاجة هتحصل ، ودة من كلام الشيخ محمد معايا او من طريقته حسيت انه راجل واصل وان ليه كرامات ، وصلت لاوضة النوم لقيت مراتي نايمة على السرير ، فرحت انها ممشيتش زي ما قالت ، حسيت اني ظلمتها ، وانها فعلا ملهاش يد في اي حاجة ، وان دة كان من افعال الشيطانة " مريم " ، غيرت هدومي بعدها وقررت اني انام على طول من كتر التعب انا اترميت على السرير ، طفيت النور ، وغمضت عيني ، لكن فجأة سمعت صوت بكى
!!!!!!!!!!!!!!!!!!!!

اتنفضت من على السرير ، وانا بحاول استوعب ان اللي سمعته حقيقة ، بس الظاهر ان مش سمع بس ، مين اللي قاعد على الشباك وهو اصلا الشباك مقفول!!!!!!!!!!!!!!!!!!!!!!!!!!!!!!
غريزيا نزلت من ع السرير وانا بحاول اتمالك نفسي واقنع نفسي ان ده بقا تخيلات مش حقيقة ، خاصة بعد كلام الشيخ محمد ، فجأة سمعت صوت صراخ ، كأن حد بيتعذب ، الصوت حاسه خارج من جوايا ، مش عارف احدد مصدر الصوت ، وقعت الارض رجلي مش شيلاني ، فجأة كل دة وقف ، ومفيش اي حاجة غريبة لما فتحت عنيا ، هدوء غريب غمر المكان ، بس فجأة حسيت بنار بتلفح جسمي كله ، ومن العدم ظهرت قدامي ، مش هقول اخر حد اتوقعه ، اللي يخلي الاموات يظهروا فمش غريبة ان الاحياء كمان يظهروا.

ريماس.. ؟

اول كلمة خرجت مني ، فجأة وبدون مقدمات سمعت منها اغرب حاجة كان ممكن اسمعها منها وقت علاقتي بيها كاصدقاء ما كانت قائمة .

مجتليش ليه لما احتجت مساعدة ، انت عارف اني اقدر اساعدك .
واختفت فجأة ، وانتهى كل شيء في الليلة دي ، بعدها استغربت انا ليه مروحتش ليها في كل دة ، ملقتش رد ، بس يمكن علشان عارف انها مكنتش بتحبني ، ومش بتطيق اسمي حتى ، بداية معرفتي بيها كانت مجرد معرفة سطحية ، لكن بعدها اتضح ليا انها كانت بتعشقني ، رغم ان الفرق الاجتماعي كان شاسع جدااااا ، فرق السما والارض ، ريماس.... بنت مرفهة جدا ، بتلعب بالفلوس لعب ، لو ولعت في الفلوس اللي عندها مش هتخلص ، ملهاش اول من اخر ، وعلشان كدة قررت تشغل

نفسها بحاجة غير لقمة العيش اللي كل اللي زيينا طبعاً بينشغلوا بيها بعد فترة من حياتهم ، ريماس بنت بتعشق التاتوه ، كل الاشكال الغريبة ، والمثيرة والمرعبة ، سمعت انها كانت ع علاقة ببعض السحرة والمشعوذين كانت مجنونة بالعالم دة ، فاضية بقا وفلوس بالهبل ، كانت تعشق سيرة الجن والعفاريت والسحر والكهنة والطلاسم والرموز اللي انا اصلاً بترعب لما بسمع الكلام دة ، كنت بحب هدير وقتها مكنتش شايف غيرها ، لكن بعد فترة من معرفتي بريماس اتقلبت كل حاجة ، هدير في حادثة عربية تموت ، وبعد كدة حادثة مريم ، اكيد فاكرين الاتنين دول ، بعدها قررت اني مش هحب تاني لكن هيا مكنتش فاهمه اني اتحطمت اصلاً بعد موت هدير ، يمكن حبي لهدير كان غلطت برده بس كان حب ومتعلق بيه ، اقتنعت ان وشها شؤم عليا فقطعت علاقتي بيها بس من يومها وهيا بتكره حاجة اسمها عمرو ، وماله عز الطلب ، بس بعدها مبقتش تهتم ، لا بيا ولا باي حاجة تخصني ، انشغلت بادارة اعمال والدها بعد وفاته ، بس وقتها حصل حاجة غريبة ، طبعاً عارفين مريم اللي انتحرت بسبب اللي عملته معاها ، مريم لما انتحرت ورمت نفسها من الشباك راحت المستشفى وكانت لسه عايشة قعدت يومين وبعدها توفت ، الغريبة بقا ان ريماس راحت زارتها ووقفت مع اهلها يومها ، الواقعة اتسجلت انتحار ، كنت هاجي في الرجلين بس اهلها اتستروا ع الموضوع ومحبوش فضيحة ، المثير للغرابة ان ريماس مكنتش بتحب مريم بتكرهها كره العمى ، يبقا ليه الزيارة الغريبة دي ،

شماتة مثلاً ؟

تاني يوم الصبح ، فكرت كتير ان ارواح ليها ، يمكن تكون دي رسالة من ربنا علشان اخر حد اتوقع انه يساعدني يكون سبب خروجي من كل دة ، خديجة مراتي لاحظت شرودي الكثير ، وبدأت حالتي تسوء ، وانا بتهرّب طبعاً بكل كلام المفروض بيتقال في مواقف زي دي ، الشغل والمسؤولية وهكذا ، حطت الفطار ، وانا باصص ع الحيطه ، فاضية مفياهاش حاجة تتدعوا للتأمل يعني ، لقتها بتاكلني زي عيل صغير ، فتحت بؤي بصعوبة جداً ، بصتلها وانا بتاملها ، ويبدو في عقلي كتير ، اسئلة غريبة دارت في عقلي وقتها ، مكنتش بتاكل قالت مليش نفس ، فتحت التلفزيون ، بتتفرج ع مسلسل هندي ، وانا سرحت فيها ، وبسال نفسي واقول.

__ياترى انسانة بالبراءة دي ليها ذنب في اللي عملته ، تفكر ربنا رزقك بيها ليه علشان تكون سبب هدايتك ، ولا علشان الخبيثون للخبيثات ، يا ترى لو عرفت ماضيا هتغفرلي ولا هيكون ايه رد فعلها

، تفتكر هتسامح ، يا ترى استاهل حبها ليا ولا مستهلوش ، هيا تعرف مريم فعلا ؟؟؟؟؟؟؟
__اه اعرفها .

صعقت من ردها ، عقلي اتشتت ، مش قادر ع التفكير ، ومبقتش عارف استغرب من ايه ولا ايه ، من كونها تعرف مريم ، ولا من انها قرأت اللي بيدور في ذهني ، ردي فعلي وقتها كان غريب ، قمت فتحت الباب ونزلت ، ومعرفش رايح ع فين ، نص ساعة ماشي في الشارع ، ومن غير تردد لما خطرت في بالي روحتلها ، ريماس .

في مكان معتاد بتقعد فيه ، ملقتهاش ، بس لقيت اللي يدلني عليها كانت بنت... معرفة قديمة في كافية في وسط البلد ، عرفت انها بتقعد في كافيه تاني في شارع الهرم ، روحت قعدت هناك من الساعة عشرة الصبح لحد الساعة اربعة العصر ، ومجئت ، مفيش اي وسيلة تانية تعرفني مكانها ، فجأة خطر في بالي رامي ، رنيت عليه يمكن يكون معاه رقمها او حتي الفيس بوك ، وبالفعل اخدت رقمها منه ، واتصلت عرفت ان انا من قبل حتي ما اقولها انا مين ، اتفقت هقابلها في نفس الكافية بعد نص ساعة ، وجت في المعاد مطبوط ، اول ما قعدت بصت في عنيا وابتسمت ، استغربت ، بس سالتها بعدها ، انتي تعرفي حاجة ؟
__عن ايه ؟

__امممممممم عن كل حاجة بتحصلي ، معتقدش انك متعرفيش
__تفتكر لو اعرف اساعدك هساعدك .
__وليه لا... ايه المانع ، مش قادرة تنسي اني كنت بحب هدير بجد ومكنش ينفع اسببها لاي سبب .
__ما انت سيبتها برده ولا ايه
__والموت يتسمى سيبتها برده.
__طالما محفظتش ع اللي بينكم بعد الموت تبقا سيبتها .
__ايه هترهبني يعني .
__لا.. بس ع الاقل كنت اثبت انك متاثر بموتها مش عمال تلعب ببينات الناس .
__واثبت لمين وليله وانا اللي يهمني اثبتلها ماتت معدتش راجعة ، ولا تقصدي كنت اثبتلك انتي ع الاقل علشان ترضي غرورك ، ويبقا ليكي مبرر اني كنت بحبها فعلا علشان كدة مسيبتهاش وحببتك.
__انت عايز ايه .

_انا واقع في مشكلة وعايز مساعدتك لو تعرفي .

_مريم.. مش كدة ؟؟

هو انا مفضوح اوي كدة ، مستغرب من اني كل ما اكلم حد الاقيه عارف كل حاجة عني كدة ، لكن مدققتش كتير وقلت بهدوء شديد .

_اه مريم .

_حل مشكلتك عندي ، بس بشرط ، تعمل كل اللي اقولك عليه .

_انا تحت امرك ، بس المهم اني اخلص من كل اللي انا فيه دة ، نفسي احس بمراتي واعيش حياة مستقرة بقا .

بصتلي بحنية غريبة وقالت .

_اللي يحب عمره ما يكره يا عمرو وانا مساعدتي ليك اعتبرها عربون صداقة جديد بس بشرط توعدي اننا هنفضل اصدقاء طول العمر .

حسيت براحة من كلامها ، بداية جديدة لكل حاجة ، ورديت وانا البسمة مرسومة ع وشي .

_اوعدك

_احكي لي بقا كل حاجة بالتفصيل الممل .

_هو مش انتي تعرفي برده كل حاجة .

_لا مش كل حاجة انا اللي اعرفه انك ندمان ع اللي عملته معاها وانك مش مستقر في حياتك بسببها.

_ااااا..... مش بالظبط كدة ، وعمتا هحكيلك ، بس توعديني انك هتصدقني .

_اوعدك.

وبدات احكيلها ع كل حاجة ، وخلصت ، عدم دهشتها من كلامي دة مش غريب لانها اصلا مهتمة

بكل ما هو غريب وخاصة الامور دي ، واللي عرفته بعدها منها انها بقت بتستخدم الطلاسم

والتاتوهات في اعمال السحر والشعوذة في عمل الخير ، ازاى معرفش كل همي اني اخرج من الورطة دي

بسلام وخلص ، بعد ما خلصنا لقتها بتقولي تعالي معايا وروحنا ع طول ع شقة في فيصل ، في الدور

العاشر ، في عمارة قديمة شوية ، الظاهر ان دي الوكر بتاعها عرفت انها اشترت الشقة دي مخصوص

علشان خلوتها ، وعلشان تكون ع راحتها في اللي بتعمله ، انبهرت بالشقة لما دخلتها محدش يتصور

ان الجمال دة هيكون في عمارة زي دي ، الفلوس بتعمل معجزات فعلا ، اول ما دخلت قفلت الباب

وقالت اقلع قميصك اترددت شوية ، بس بعدها نفذت ، استغربت من عدم حيائها من موضوع زي دة ،
بس عادي دي ريماس برده .

رسمت ع ضهري وشم غريب معرفش ايه علاقته بكل دة ، بعدها ، ادتني ورقة وازازة صغيرة فيها
مادة حمرا معرفش نوعها ايه ، وطلبت مني اني احط المادة دي في ماية واستحمي بالماية دي ، وفي
الوقت نفسه قبل ما اخرج من الحمام اقرأ المكتوب في الورقة بهمس ، واردها سيع مرات ، سالتها وانا
ببص على الوشم في المراية .

__تفتكري دة هيجيب نتيجة ؟

ضحكت بصوت عالي وقالت .

__دة كل النتيجة يا نفسي

__اما نشوف

خبطت ع كتفي وقالت .

__يوضع سره ها ...

عجبنتني ثقتها في نفسها ، حسستني بانها عارفة هيا بتعمل ايه كويس ، وانها مش مجرد هاوية ، لا
دي عارفة الداء والدواء كمان ، نزلنا تاني وكانت الساعة حوالي سبعة ونص ، سلمت عليا وقالت انها
هتظمن عليا بالليل بعد ما اخلص ، سيبتها وروحت ع طول مستعجل ع التنفيذ ، عايز اخلص من كل
دة بقا ، نفسي احس براحة واني خلاص هكون عريس من تاني ، وصلت البيت ، طلعت ع فوق ع طول
من غير ما ابص حتى ع اهلي ، قلت لخديجة تحضرلي هدموم ع ما اعمل حاجة ، دخلت اوضة الاطفال
قفلتها وفتحت الورقة اشوف فيها ايه ، لقيت كلام غريب ، مفهمتش غير كلمات بسيطة جدا زي -
العهد - قربان - الموت - ملك الملوك - حارس الأبواب والباقي بنطقه وبس ، من غير فهم ، ما علينا ،
خديجة خبطت عليا فتحت ع طول وسالتها جهزتي الهدوم ؟

__اه

رد بارد زي الثلج ، بس مش مهم المهم اخلص الاول وبعدين اصالحها ، دة اللي خطر في بالي ،
حضرت نفسي ودخلت الحمام ، قلعت هدمومي وجهزت كل حاجة ، ويدات اخد من الجردل وارش
الماية بالمسحوق الغريب ع جسمي ، لحد ما خلصت الماية بعدها لبست هدمومي ، فتحت جيب البنطلون
اطلع منه الورقة ملقتهاش ، دورت كتير وقليل برده ملقتهاش ، معقول تكون مريم لعبتها تاني معايا

، ممكن اكون نسيتهها برة ، بس دة شرط قبل ما اخرج لازم اقراها ، ناديت ع خديجة ، كذا مرة مفيش رد ، فتحت باب الحمام من غير ما اخرج وناديت محدش رد فجأة لقيت الباب بيخبط ، يادي الليلة السوداء ، اعمل ايه مش عارف راحت فين بنت ال... بقيت متغاض جدا ، كل اللي عملته هيضيع ، صوت الخبط بقا اقوى ، مفيش مفر من اني افتح ، لبست هدومي وانا مخنوق ، وخرجت فتحت الباب لقيت خديجة مراتي ومعها!!!!!!

خديجة مراتي واقفة ع باب شقتنا ومعها - اسلام - صاحبي ، مبعثش عارف ا قوله حمدالله بالسلامة ع رجوعه من امريكا ولا ا قوله انت واقف مع مراتي بتعمل ايه ، ولا اسالها هيا مدخلتش ليه ع طول مهني معاها مفتاح ، لكن هيا قالت .

__اسلام... ابن خالتي جي يباركلي ع جوازنا
!!!!!!!!!!!!

اسلام يبقا ابن خالتك ، مكنتش اعرف ان اسلام يبقا ابن خالة مراتي ، اسلام اعرفه من ايام الجامعة شاب محترم جدا ونضيف ، واخلاق ، بالتاكيد لو عرف اني انا اللي هتجوز بنت خالته كان رفض ، بس هوا كان ديما نصوح ، وبينصحنني ، محافظ ع الصلاة ، وكان متفوق جدا ، بعد الدراسة سافر ع امريكا يعمل دكتوراه هناك في الاقتصاد ، وقفت مصدوم ، مش عارف اقول ايه ، فجأة لقيته بيتعامل معايا بكل دبلوماسية وبيقول

اهلا وسهلا ، اتشرف بيك

اهلا وسهلا عمرو انا اتفضل اتفضل

دخلنا ع جواز طول وطلبت من خديجة تجهز لنا عشا ، وهوا ما اعترضش ، كاننا احنا الاتنين عايزين نقعد مع بعض من غير هيا ما تحس ، قفلت باب الاوضة علينا ، اول ما قعدنا لقيته بيقولي
__لو اعرف انك هتكون جوز بنت خالتي كنت قتلهم لا ، ، انا مش جي هنا علشان ابارك ، انا جي هنا علشان اساعد بنت خالتي واخرجها من الورطة اللي انت ورطتها لها بسبب عمالك السوداء.
__ورطة ايه ؟

__بص يا عمرو انا طول عمري بقولك بلاش السكة دي ، لكن ان خديجة تبقا ضحية زي اللي فاتو لا.. مستحيل .

__اه... لو لسه مفكر اني زي الاول تبقا غلطان ، انا دلوقتي بحاول اتغير ، بس الظاهر ان مفيش

فايدة ، كل ما احاول اتغير الاقي اللي بيرجعني مليون خطوة لورا ، وكأني الوحيد في الدنيا دي اللي ملوش توبة .

-أنا سبب وجودي هنا ، رسالة.

-رسالة ؟ رسالة اية ؟

-انت تعرف حد اسمه الشيخ محمد سليمان ؟

- اه اعرفه .. ماله

-جالي امبارح وقالي لازم ترجع .. عمرو في خطر-

-نعم .. جالك امبارح ، لا ابوس ايدك اهدى عليا كدة وفهمني .

-متعود ديمما بعد ما اخلص شغل بنزل اعدي على مسجد قريب من الشركة اصلي الظهر والعصر هناك ، فجأة لقيت راجل بجلابية بيضة ماسك سبحة واقف على باب المسجد ، عرفت من هيئته انه عربي ، فجأة ناداني باسمي وقال ارجع لعمرؤ لانه في خطر ، اكتر من كدة مقدرتش اعرف منه ، لانه مشي ، على ما جببت جزمتي كان فص ملح وداب.

ردیت انا بعصیة :

-انت بتقول ايه ، الكلام دة مش حقيقى .

-وان هكذب في اية وليه ، تفتكر واحد زيك هاحتاج اني اكذب عليه .

- لا مش كدة خالص يا اسلام -

-امال ایہ...؟

-ازاي جالك امريكا وهوا في الوقت دة كان قاعد معايا اصلا .

[illegible]

-طبعاً مش هتصدق وهتقولى انا بقى كذاب ، وفرضا ان كل دة حصل ، اشمعنا انت اللي جالك يا اسلام

وقالك انى في خطر؟

-لانى عارف سبب كل اللي بيحصلك دة يا عمرو!!....

- !!!

-وعارف من فترة كبيرة كمان بس انا مكنتش اعرف ان الامور هتكون بالطريقة دي ، انا نزلت

مخصوص علشانك اه ، بس لما عرفت انك اتجاوزت بنت خلتي مبقش عندي استعداد ان اسكت ، خاصة

انى شايف ان " خديجة " بتحبك " وانا مقدرش اجرح شعورها ولو بكلمة .

عقلي من كثر الصدمات اللي اتعود عليها بقى شبه واقف ، شبه عاجز عن الإندهاش أو التعجب ،
اكثر من كدة بقى هيكون جنون ، عقلي هيشث ، شعري راسي شاب ، مش قادر اصدق اني كل شوية
بغرز في الطين اكر ، فكرة ان ريماس هيا السبب مش قادر استوعبها ، لدرجة اني مسألتنش ايه اللي
حصل ، او احكي لي ، او فهمني ، الفكرة نفسها شبه مطرودة من دماغي ، بس كلامه منطقي جدا ،
ومكنش قدامي غير اني اسمع منه وافهم بيقول كدة ليه ، بس وقتها معرفش ليه حسيت باني فعلا
محتاج أبكي ، فيه شحنة حزن جوايا لازم تخرج ، فيه اضطراب شديد بيضرب صدري ، قاومت كل دة
، ومن غير ما ابص عليه قولتله :
- احكي يا إسلام .

” إسلام بيحكي لعمرو ”

- لما عرفنا بموضوعك انت ومريم يا عمرو كنا وقتها في الكافيه ، مش محتاج طبعا اقولك ان تمارا هيا
اللي عرفت ” ريماس ” باللي حصل ، وكنت انا وريماس بس اللي نعرف في الشلة كلها ، استغربت ليه
ريماس معرفتش حد ، وليه كتمت على الموضوع ، قولت بقى انها واحدة عايزة تأذيك ليه متبلغش عنك
، لكن لقتها ساكتة ، الأغرب من كدة ، أنها قررت تزور مريم ، رغم انك كنت عارف انها مش بتطبيق
مريم ولا بتحب تسمع اسمها ، قولت يمكن بتشمت فيها ولا حاجة ، لكن دي راحت هناك وقعدت مع
اهلها ، وبتواسي فيهم ، والمثير للغرابة اكر انها في ليلة كانت هيا المرافق ليها في المستشفى ، بقيت
مستغرب وبتعجب ازاي ، وليه ، وبعدها طبعا توفت مريم ” ربنا يرحمها ” لقيت بعدها ” ريماس ”
بتقولي انها لقت الطريقة اللي تنتقم منك بيها ، قبل ما تقول حاجة وقبل ما تقول انا ليه مقولتنش لما
عرفت ، انا وقتها كنت شايف ان كل حاجة بتحصل فيك وبتحصل فانت تستاهلها ، لانك اذيت ناس
كثير يا عمرو .

- المهم .. فيه شقة في فيصل هيا كانت اشترتها من فترة ، كنا بنتقابل فيها احنا والشلة ، وفي يوم كنا
مجتمعين هناك كلنا ، بس حسيت ان ريماس مش عايزة حد يقعد معاها اليوم دة ، قررت اني اسحب
نفسي ، وامشي ، واسحب الناس معايا ، قمنا مشينا وانا ع الباب قالت :

- استنى يا إسلام عايزاك .

اتخرجت وقتها ، لكن وقفت ، الناس كلهم مشيوا ، وبعدها قفلت الباب وقالت وهيا الشر ببطل من عنيتها :

– أنا هستدعي ” قرين ” مريم .

اتصدمت من كلامها لما سمعته ، اترعبت من الفكرة نفسها ، معتقدتش ان لو الدنيا كلها بتكرهك ، مش هيبكون اد كرهاها ليك .

– بعدها دخلت الاوضة وخرجت ومعاها شنطة ، بدات تخرج منها حاجات غريبة ، ومن ضمن

الحاجات دي ، تيشيرت !!!!!!! سالتها ايه دة ، ردت عليا وقالت :

– عارف دة تيشيرت مين ...؟ مريم .. اللي ماتت بيه ، اخدته من مامتها لما كنت هناك ، ومكنش

عندي مانع اخسر شوية دموع علشان اجيبه ، الغريبة انا معرفش انا بعرفك ليه كل حاجة عني ،

يمكن علشان شيفاك نضيف مش زيينا ، بس متقلقش ، مسيرك تتعلم .

انا بقيت مذهول من كل حاجة بتحصل حواليا ، بقيت بتفرج وانا ساكت ، مش قادر انطق بحرف ،

حسيت اني لو اتكلمت وقتها هكون قضيت على اللي باقي من عمري ، وقفت عاجز قدام شرها

وجحودها اللي ملهوش نهاية ، انتهت بعد فترة من كل التحضيرات اللازمة للعمل الشيطاني بتاعها

، وقفلت النور ، وعلى ضوء الشموع بدأت في ترتيب كلمات غريبة ، حسيت ان روحي بقت خارج

جسمي ، انا مش جوايا ، انا برة ، في عالم تاني ، مبقتش مستوعب أي حاجة من اللي بتحصل ، كأني

في غيبوبة بفوق منها كل عشر ثواني ، بعدها حسيت بارتكاز لكل حاجة حواليا ، قامت من مكانها

وطلعت من الشنطة برده قميص ، قميص ازرق ، ومن غير ما افهم بتعمل كدة ليه ، لبستني القميص ،

ورجعت بعدها تاني للي بتعمله ، فجأة حسيت بأني شحنة كهربائية دخلت في جسمي ، حسيت بان

فيه حد غيري جوايا ، وانا بتكلم ، بس انا مش اللي بتكلم ، معرفتش اية اللي حصل ، واياه اللي دار

من حواليا ، غير بعدها لما انتهت هيا من كل حاجة .

بس انا عايز اسالك سؤال يا عمرو ...؟ انت كنت لابس اية يوم الحادثة بتاعت مريم ، مش هوا نفس

القميص برده ...؟

!!!!!!!!!!!!!!!!!!!!!!

– لسه الذهول بدري عليه اكملك بقى ، بعدها وقعت على الارض محستش باي حاجة ، كأني كنت

متخدر وفوقت من التخدير ، جت عيني في عنيتها ، وسالتها :

– ليه كل الشر دة ، وهتستيفدي ايه من كل دة .

– سؤال غبي ، طبعا هستفيد ، اكيد لما انتقم منه هيعرف انا مين واقدر اعمل ايه .

– تفتكري كدة هيحبك يا ريماس .

– وليه لأ ، لما يتذل وميعرفش حد يخلصه من اللي هوا فيه ، اكيد هيحبني علشان اخرج من الورطة دي باي تمن ، وساعتها انا اللي هحدده .

– طيب ممكن اعرف انتي ناوية على ايه .

– هقولك ناوية على ايه ... بس مش محتاجة اقولك انه سر بيني وبينك ليوم القيامة .

” في عقلي قولت ” وانت لو تعرفي ان فيه قيامة هتعملي كل دة .

– اوعدك انه سر ومش هيخرج لحد .

– عمرو مش النوع اللي ممكن ضميره يأنبه مدة طويلة ، بدليل انه بعد شهر من الحادثة قرر يتجوز اهو ، عايز يبقى عريس ومش فارق معاه أي بنت جرحها او عذبها او آذاها ، بس انا مش هخليه يتهنى بيوم بعد النهاردة ، وبشرط هوا واحده بس اللي هيعاني ، علشان يدوق طعم العذاب ، بس على ايدي انا بقى .

– برده معرفتش هتعملي ايه ، او انتي عملتي ايه .

– هقولك ... انت عارف الساعة كام يا إسلام في ايدك ، الساعة دلوقتي ٣:٣٠ الفجر ، يعني حضرتك واقف قدامي بقالك ٦ ساعات ونص يعني من الساعة ٩ لحد دلوقتي .

!!!!!!!!!!!!!!!!!!!!!!!!!!!!

– عارف كنت بعمل ايه ، قرين مريم كان متواجد بجسمك دلوقتي ، صعب جدا انه يتواجد قدامي طول المدة دي من غير جسم يحتويه ، وانت كنت الوعاء اللي احتوى قرين مريم .

– انا مش فاهم أي حاجة من اللي بتقوليه .

– افهمك ... كل واحد مننا ليه قرين ، لما بنموت احنا ، القرين مش بيموت ، لا بينفصل عن الجسد ، وبيكون في بعد تالت غير بعد البشر والجن ، القرين بيفضل ليوم القيامة محتفظ بكل حاجة حصلت في حياتك ، ومش بينتقل لشخص تاني ، لا ، كل انسان قرينه ليه هوا ويس ، بس بعد الإنسان ما بيموت ، القرين بيفضل يدور على الشخص اللي كان معاه ، ومش بيبكون مستوعب انه مات ، علشان كدة بنلاقي فبعض الاوقات ان ممكن حد مننا يسمع صوت حد مات بيتكلم ، او ممكن يتهيا لينا اننا شوفنا

حد ميت ، دة بيكون القرين ، مش روح الميت او الميت نفسه ، بس دة بيحصل مصادفة ... انا بقى كنت بحاول اخلي الموضوع مش صدفة ، لا اخليه يحصل بأمر مني انا .

– انتي عايزة توصلي لايه؟

– زي ما القرين بيتسحر وهو صاحبه عايش ممكن اسحره بعد صاحبه ما يموت ودة اسهل ، لان هالة الشخص اللي معاه ممكن تقويه ، وتخلي سحره اصعب ، لانها بتقوى بالايمان والعبادة ، متستغريش من كلامي دة انا برده درست الموضوع كويس ، انا بقى سحرت قرين مريم ، علشان يكون تحت امري انا ، يعمل اللي اقوله عليه وبس .

– وليه قرين " مريم " كان ممكن تستدعي أي خادم من الجن ويقوم بكل اوامرك .

– علشان المتعة تبقى اقوى ، والاثارة تكون اشد ، ثانيا لان قرين مريم زعلان على فقدان الجسد اللي كان بيحتويه ، فهيكون إنتقامه أشد ، خاصة بعد تلقينه الدرس كويس ، امال انت لبست قميص " عمرو " ليه ، مهو علشان هوا عرقان في القميص دة ، تعرف ان القرين افتكرك هوا ، وكان هياذك لولا اني منعتة .

– طيب وايه سبب انك تجيبي التيشيرت بتاع " مريم " ...؟

– امال هاقدر استدرج القرين ازاي ، لازم فح علشان يخضع ، فصيلة القرين غير فصيلة الجن ، القرناء أقوى بكثير ، وشهرهم مستطير ، مش هما دول برده اللي بيأمرونا بالشر وبسببهم بندخل النار . ريماس ، البنات المرفهة دي ، اللي اتولدت وفي بؤها معلقة ذهب ، بتتكلم في كل دة وتعمله ، مكنتش اتصور انها ممكن تكون بتفكر كدة ، منكرش اني كنت معجب بيه ، بس بعد اللي شوفته انا غيرت رأيي نهائيا .

– وناوية على اية بقى ...؟

– هقولك .

حكنتلي بعدها على كل حصل معاك في الليلة إياها ، مكنتش متصور اني هارجع الاقويك عايش بعد اللي شوفته ، ويمكن اللي جي اسود كمان .

– ولما أنت عارف دة كله ، وساكت جيلي ليه دلوقت؟

– الليلة اللي باتت معاها فيها ، اخدت جرعة كبيرة منها ، وكل دة برده علشان عاملة حساب كل دة ، صدقني لو العالم كله بيخطط علشان يأذيك مكنش هيخطط التخطيط دة يا عمرو ، كان لازم هيكون فيه ثغرة ، لكن هيا مسابتش وراها حاجة .

– والدم دة ليه؟

– لما واحد ببيجي يعمل عمل لواحد بيحتاج حاجة منه ، شعره ، او هدوم عرق فيها ، وهكذا ، فما بالك بالدم بقى ، دة اقوى دليل عليك وعلى وجودك ، هيا بقى عايز تثبت وجود القرين ، وتتغلب عليه ، فخلطت الدم اللي هوا اساسا سبب وتمسكه بالانتقام ، بالزعفران اللي بيضعف من قوته علشان تسيطر عليه ، أما بالنسبة للورقة فكان مكتوب فيها ، انك بتبيع نفسك ليها ، وانك بتسلم نفسك كقربان للقرين ، من باب إرضاء القرين ، وتقديمك ليه ككبش فداء ، فهمت ...؟

– فهمت؟ تفتكر بعد ما افهم هاعمل ايه قدام شرها دة ، انا لو قعدت طول عمري اجرح في بنات الناس عمري ما كنت هبقى بالشر دة .

– السحر شرك بالله ، ومفيش جرم أعظم من كدة ، علشان كدة انا جيت وقولتلك ، رغم اني خايف لتعرف .

– دة الاكيد انها عرفت ، متأكد انك اول ما تمشي من هنا هتسمع خبر وفاتي ع ما تروح البيت .

– الليلة؟ معتقدش .

– اشمعنا؟

– لأنك منفذتش اللي طلبته منك ، وحاليا هيا في قمة الإنهيار .

– هههههههه طمنتني يا إسلام ، يعني إتأجل موتي لبكرة .

– ممكن يتأجل إلى أجل غير مسمى .

– إزاي؟

– فيه حل واحد معرفش هتقدر تعمله ولا لأ ، بس هوا دة الحل الوحيد ، وفرصة النجاة الوحيدة قدامك .

– إيه هوا أرجوك قللي .

– مفهمتش حاجة من كلامي اللي فات دة كله؟

– أرجوك يا إسلام .. مش وقت أَلغاز .

– القرين مين بيسيضر عليه دلوقتي ، ” ريماس ” صح ؟.. وكل ما يحاول يهرب مين يرجعه ؟.....“
ريماس ” مين استدعاه ؟.. ” ريماس ” ، مين عايز يأذيك ؟.... ” ريماس ” ، يعني لو مبقاش فيه
ريماس ، محدش هيرجعه تاني ؟.....
– تقصد إني ...

– اقصد اللي انت فهمته ، ولو هتنقذ يبقى دلوقتي انسب وقت .
دخلت علينا ” خديجة ” وساعتها سكتنا احنا الاتنين ، استغربت من اندماجي انا واسلام بالسرعة في
الكلام ، طبعا لانها متعرفش اني اعرفه من قبل حتى ما اعرفها بسنين ، حطت الاكل ، وقعدنا احنا
الثلاثة ناكل ، اسلام بياكل هوا خديجة ، وانا قاعد بندغ في لقمة بقالي عشر دقائق ، بفكر في كلامه ،
بفكر في اللي جي ، بفكر في الحل الوحيد ، طوق النجاة ، حبل النجاة مرمي ليا انا لوحدي وبيقولي
اطلع ، اطلع ، بس دة قتل ، لو قتلت ... ايه هتسجن ؟... دة على اساس اني لو مقتلتش هدخل الجنة
، اكيد هموت من السواد اللي جي ، هموت من الاهوال اللي هتحصل ، هموت من الخوف مليون مرة
ومرة في الدقيقة ، وحتى لو محصلش اللي بيقول عليه ، هموت من التخيل ، اتفزعت لما ايد خديجة
لمست كتفي ، سألتني :

– اية مالك فيه ايه ، إسلام بيكلمك مش بترد عليه ليه .
– اااااا لا مفيش بس الواحد تعبان مش عارف من ايه ، معلش يا اسلام انت عارف بقى مشاغل
المتزوجين .

– كان الله في العون يا عمرو ، اكيد هما المغفلين ليهم راحة .
قال الجملة دي إسلام وضحك ، خديجة استغربت تاني من رد فعل إسلام ، بتقول طبعا هوا اخد عليه
بالسرعة دي ازاي ، واكيد هتشك اذا كنا نعرف بعض ولا لا ، خديجة نفسها فيها حاجة مش طبيعية
، حاسسها مكتئبة ومنطوية جدا الايام دي ، معرفش يمكن تعبان علشان انا تعبان ، ولا علشان اصلا
تعرف حاجة ، ولا انا وانا نايم بخطر بكلام ولا اية الحكاية بس مبقتش عارف .

خلصت قعدتنا مع بعض فوق ، ونزلت بحجة اني هوصل إسلام ، نزلت ومن جوايا قرار أني لازم
انتهي من كل حاجة النهاردة ، ينتهي انا ، او هيا تنتهي ، إسلام قبل ما يسبيني ويمشي ، قالي :

- إسلام هو اللي طلب مني أني اعمل معاك كدة ، لقيته في يوم بيتصل بيا بيقولي عايزك ضروري ،
واتقابلنا ، وفهمني على كل حاجة ، وفي يوم كنا قاعدين عندي في الشقة ، الشلة مشيت ، وهو معاهم
، لكن مفيش خمس دقائق وطلع تاني لاننا كنا متفقين على كدة ، وبدأت الليلة ، بعد ما خلصنا اللي
بنعمله من تحضير ، واكيد هو حكى ليك أني انا اللي قمت بكل حاجة ، وانه مكنش يدوب غير
كومبارس ، ملوش أي دور واني انا اللي بحركه ، كل اللي حكاه ليك صحيح ، بس مشاطرة بيني
وبينه ، كل حاجة حصلت كانت على ادينا احنا الاتنين ، من أول قميصك اللي راح جابه من تمارا ،
لحد تيشيرت " مريم " ، ومش من أول هنا وبس ، لأ... من غير إسلام أنا عمري ما كنت هدخل
المجال دة أبدا .

- إسلام هو اللي أقنعني بأني أدخل ، إسلام اساسا في الحقيقة ساحر ، بدأ حياته دجال ، ونصاب ،
بعدها قرر أنه لازم يدخل المجال من اوسع ابوابه ، بدأ يتعلم على ايد ناس كثير ، وطبعا كلفه كثير
الموضوع دة ، اقرب حاجة انه اتنازل عن رجولته ، في سبيل ان احد السحرة يعلمه طريقة استحضر
القرين ، إسلام في سبيل أنه يأذيك ويعذبك ، إتنازل عن حاجات كثير ، لما بدأ في المجال بقى واعتمد
على نفسه ، لقي أن الموضوع بيحتاج في البداية مصاريف ، ولازم فلوس علشان يقدر ينفذ المطلوب ،
وكنت انا في وشه ، لقاني غنيه وبلعب بالفلوس لعب ، وطايشة ، مفيش مانع من بعض المرح معاها ،
بالفعل ، اول ما عرض عليا الموضوع وافقت ، وهو دة السبب اللي خلاني مهتمة بالعالم دة ، هوا كان
بيعرف يخبي لكن انا مكنتش بعرف ، هوا قدر يظهر بمظهر الشيخ التقى الورع ، وانا بصورة الشمال ،
طبعا انا وقتها كنت بكرهك ، مش بكرهك بالمعنى ، لا غيرانة عليك ، انت استحالة طبعا تخيل اني
ليا قلب بيحب ، بس معلش ، عمري في يوم ما كنت هافكر انذيك ، بس لقيته هوا بيقولي :

- اية رايك اخلي غسلام يجي تحت رجلك ويحبها كمان ... ؟

- دة ازاي دة يعني .

- استخدمني اللي ربنا ادوولك وبطلني غباء .

- تقصد ايه يا اسلام ... وتفكر لو حصل هيبقى كدة انا حصلت عليه .

- انتي متهنتيش بيه ، يبقى على الاقل غيرك ميتهناش بيه ، ولا اية ؟

ساعتها انا مقدرتش اشوف حد غيري جمبك وانا واقفة بتفرج ، في فترة من الفترات انعزلت تماما
بحجة اني مشغولة في ادارة اعمال بابا ، لكن الموضوع مكنش كدة خالص ، كنت بحاول امنع نفسي من

- إسلام من أول سنة في الكلية وهو يحب هدير وبيتمنى أنها ترضى عنه ، وتقبله حبيب ، أو حتى كلب متعلق في سلسلة في اديها ، لكن هيا كل مرة ترفضه وتسمعه كلام يجرحه ، هيا غصب عنها ، وهو غصب عنه ، الحب بيعمي ، والبرود بينرفز .

- أبوة بس انا محبتهاش غير في تالت سنة في الكلية .

- طول السنينت اللي فاتوا كان حاسس ان هيا اللي بتحبك ، علشان كدة كان بيحقد عليك ، كان مفكر انك السبب في كل دة ، طبعاً انت اللي تعرف بقى اذا كان في الوقت دة كانت بتحبك ولا لا .

- ولو كانت بتحبنى .. انا ذنبي ايه في انها حبتني وهو لا ... ؟

- معرفش .. بس من يومها وهو حياته اتقلبت .

- يعني كل دة بسبب حب هدير ليا ؟

- شوفت الحب بيعمل ايه ، مشكلتك أنك متعلقتش بحد ورفضك ، طول عمرك بتحب ، وتطلب تلاقى ، اما انك تترفض دي صعوبة اوي عليك انك تحسها ، تعرف اللي هون عليك موت هدير ايه ...؟ هوا انها كانت بتحبك ، يعني عارف انها ماتت وهتقابل ربنا بذنب حبها ليك ، يعني قلبها مشغول بيك ، فانت متظمن ، انما لو خانتك او انفصلت عنك لاي سبب تاني ساعتها بس هتعرف يعني ايه تحب حد ومتطولوش .

- مش عايز احب ، ولا عايز حد يحبنى ، انا عرفت علتى ، وعرفت علاجي ، وذنوبي ربنا وحده يحاسبني عليها ، غير كدة مش هاسمح لاي حد بانه يلعب بيا ، وانه يحدد حسابي او جزائي ، لكن اللي انا لسه مفهمتش برده ، اية اللي يخلي " إسلام " عايز ينتقم منك؟

- هدير .

- مالها هدير !!!!!!!!!!!!!!!!!!!!!!!!!!!!!

- أنا اللي بعث واحد يضربها بالعربية .

قلبي ضرباته بقت أسرع وكأنها عايزة تخرج تنتقم منها ، ساعتها بس بدأت دموع عنيا تنزل ، من غير مقدمات ومن غير ما تقف على الجفون تراقب الاول هل من مراقب ، مبقتش حاسس بالدنيا من حواليا ، قمت من مكاني في إتجاه الباب ، هيا بدأت تصرخ وتقول

- رايح فين ، متسيبنيش لوحدي ، ارجووووووك .

لكن كأني مسمعتش حاجة ، فهمت اللي بيحصل معاها حاليا ، السحر أقلب على الساحر ، لكن أنا مش ملاك ، لو في ايدي مساعدة إستحالة هقدمها بعد اللي حصل ، نزلت الشارع وقفت قدام العمارة بتأملها ، وبسال نفسي واقول ، ياترى لو سكان العمارة دي عرفوا باللي كان بيحصل جوا كان هيعملوا اية ، الناس في غيبوبة ، فعلا حاجات كتير بتحصل جمب منك ، عمرك ما كنت تتخيل انها قريبة منك ، لكن متستغربش ، طلعت برة على ناصية الشارع ومبقتش عارف هروح فين ، اروح للشيخ محمد سليمان ، ولا اروح لإسلام ، وارجع بيتي ، ول..... فجأة سمعت صوت تكسير إزاز ، وصفيح ، وإنذار العربية شغال بدون توقف ، الناس خرجت تشوف إية اللي حصل ، شقة في الدور العاشر وقع منها حد محروق ، وتقريبا بنت .!!!!!!!!!!!!!!

قررت أني لازم اتمشى شوية ، قبل ما ارجع البيت أعصابي تعبانة ، عايز اصرخ ، عايز اتكلم ، عايز احكي ، حد يسمعني ، حاسس اني كل شوية بتعب والحمل بيزيد عليا ، وانا ماشي تجنبت امشي في الشوارع العامة ، ماشي في شارع جانبي ، الشارع ضلمة ، بس على ضوء القمر تقدر تحدد ملامح الطريق ، ماشي وباصص في الارض ، بفكر اروح لإسلام ، فجأة سمعت صوت مش غريب عني .
صوت الشيخ / محمد سليمان بينادي عليا .

– عمرو ، ربنا حفظك ونجاك ، تأكد أنه طالما عمل معاك كدة يبقى بيحبك ، عايزك تقابله نضيف ، دي نعمة من ربنا ، أوعى ترفضها او تضيعها من ايدك .

– ايوه يا شيخ محمد بس لسه الحكاية منتهتتش .

– لا أنتهت يا عمرو يابني ، كل ظالم خد جزاءه ، ربنا يا عمرو يابني هوا اللي يحاسب وهوا اللي يقرر مين مذنب ومين مخطئ ، احنا كبشر حسابتنا غلطت ، نظرتنا للامور نظرة بشرية ، انما هوا نظرته إلهية .

– المرة اللي فاتت قولتلي روح ومتخافش ، وسمعت كلامك ، روحت لقيت لسه الحكاية بتبتدي .

– علشان توصل للدرس دة يا عمرو ، مش كل حاجة في البلاء وحشة ، ولا كل حاجة في النعمة حلوة ، خد الحلو من الوحش يابني .

– درس اية يا شيخ محمد ...؟

– دور جواك يا عمرو ... لو خرجت من محنتك من غير دروس يبقى انت لازم تعيدها تاني .

– استنى يا شيخ محمد فهمني طيب انت ساعدتني ازاى ...

عليه ، يقوم ربنا بوقع الحدة في مصيبيه أو مشكلة ، علشان ربنا حابب العبد دة يكون جمبه ، يكون مطيع ليه ، يكون فاكهه ، مش لان ربنا عاجز من غيره استغفر الله ، لا .. لان ربنا مش حابب ليه النار ، حابه في الجنة ، أكتشفت أننا كبشر مينفعش نكون الميزان ، وفي نفس الوقت نكون الموزون ، لما غلطت ، وقرروا يحاسبوني ، ميزانهم مكنش عادل ، قانونهم مفيهوش توبة ، لكن في قانون ربنا موجودة ، بس بشرط تكون صحيحة ، أنا صحيح غلطت ، وغلطي كبير ، بس العدل عمره ما يكون كدة ، عايزين ينفذوا عدل ربنا ، وهما ببشركوا بيهه وبيكفروا ، طب ازاي .

أكتشفت اني كنت غلطان حتى لما قررت أبدأ حياة جديدة ، كان لازم أكفر عن ذنوبي ، كان لازم أتوب توبة نصوحة ، لو تعرفي يا مريم أنا ندمان أد أيه على اللي عملته معاكي ، متأكد هتسامحيني ، وواعد مني مش هنساكي طول عمري ، وهاعمل اللي يقدرني عليه ربنا علشان اكفر عن اللي عملته .

ليلة الدخلة ، ليلة العمر ، ليلة كله بينتظرها ، ليلة فارقة ، ليلة بتفضل بين حياة العزوبية وبين حياتك كزوج مسئول ، بس الليلة دي مش بتكون بس علشان ليلة بتقضيها مع عروستك وخلص ، كله بيفكر كدة ، لكن متكونش الليلة دي بداية بداية لحياة جديدة ، صفحة جديدة بينك وبين ربنا ، بعد اللي حصل معايا اكتشفت انها ليلة فارقة فعلا ، ليلة مهمة جدا في حياة أي حد فينا ، ليلة بيبتيدي فيها عهد جديد .

وانا بفكر مع نفسي ، حسيت اني اتغيرت حتى في تفكيري ، لو كان حد قالي الكلام دة مكنتش هقتنع حتى بكلمة واحدة ، لكن التجربة خير دليل فعلا ، وانا جربت ، وقررت ، قررت ان الليلة دي هتكون هيا البداية ...

دخلت شقتي وانا بتسحب علشان " حديجة " متصحاش لكن فجأة لقتها فتحت الباب ، سألتها وانا مبتسم :

- صاحية ليه لحد دلوقتي ...؟
- لقيتك تأخرت وقافل تليفونك قلقت عليك ، انتظرت لما تيجي وبعد كدة انام حسيت بأن فيها حاجة متغيرة ، إبتسمت ، وقولتها :
- طيب انا جعان عايز اكل .
- هحضرك الاكل حاضر .

– انتي بتقولي ايه ؟... لا مينفعش .

– ليه ... صدقني ثوابك عند ربنا لما تعمل حاجة زي دي هيكون عظيم ، ما تقابلش السيئة بالحسنة ،

ربنا بيقول " (وَلَا تَسْتَوِي الْحَسَنَةُ وَلَا السَّيِّئَةُ ۚ ادْفَعْ بِالَّتِي هِيَ أَحْسَنُ فَإِذَا الَّذِي

بَيْنَكَ وَبَيْنَهُ عَدَاوَةٌ كَأَنَّهُ وَلِيٌّ حَمِيمٌ) ودول ماتوا ومش هيرجعوا للحياة تاني ، واكيد

نفسهم يرجعوا علشان يكفروا عن ذنوبهم ، وانت كنت في محنة وكنت عايز اللي يساعدك وربنا بعثلك
اللي يساعدك ، فمتبخلش على حد يمكن تكون دي سبب ان ربنا يكفر عنهم .

– عارفة ... لو حد عيرك قالي كدة ، كنت قلت عليه دة مجنون ، لكن انتي حنينة اوي ، انا ربنا
رزقني بيكي علشان يهديني بيكي وتكوني انتي سبب من اسباب هدايتي ، اعلمي اللي انتي شايفاه صح
، وانا هقوم اصلي المغرب ، واقرأ الورد بتاع كل يوم على ما تجهزي الغدا .

اليوم دة كنت تعبان جدا في الشغل جيت اكلت ونمت ، نمت حتى من غير ما اخد بالي اني هنام ، وفي
الحلم ، اه في الحلم شوفت شخص كان فنسي اشوفه من زمان ، الشيخ محمد سليمان ، شوفته
بيضحكي ومبسوط جدا ، ساعتها انا كنت عايز اكلمه ، لكن على صوت المنبه صحيت ، ازاي دة حصل
معرفش ، نسيت وظبطت المنبه على الساعة ٢ بدل ما اظبطه على ٣:٣٠ علشان اصلي الفجر ، كملت
نوم على أمل اني اشوفه ، لكن محصلش ، لكن قررت اني بما ان بكرة اجازة فلازم اروح ازوه بعد ما
عرفت عنوان بيته في محافظ قنا ، مشوار بعيد ، بس صاحبه يستاهل ، اخدت معايا " مريم " وخديجة
، وسافرنا ، اهو غير جو على الاقل ، طول الطريق بسمع صوت مريم بتتكلم وانا ابصلها واضحك ،
وخديجة تبصلي وتبتسم ، احساس حلو انك تحس اني فعلا كفرت عن ذنوبك ، بس القبول بقى بتاع
ربنا ، بس متأكد أن ربنا هيسامحني ان شاء الله ، وصلت لقريه " الشيخ عيسى " قريه من قرى
محافظه قنا ، استغربت لما عرفت انه من قنا ، معتز قالي انه جي الحسين هيقعد فترة ويمشي ،
واستغربت لما عرفت ان معتز اصلا ميعرفش الشيخ دة غير من قبل ما اروحله يومها بيومين ، لكن كان
فيه بنهم صله غريبه ، وصلت لحد البيت ، نزلت من العربيه وخبطت على الباب لكن محدش فتح ،
مرة والثانية ، والثالثة برده محدش فتح ، فجأة لقيت راجل كبير في السن عنده حوالي سبعين سنة ،
بيسألني بصوت وقور جدا وقال :

– انت عايز مين يابني ؟.....

✽ نبذة عن الكاتب ✽

محمد سيد الأكرت الشهير بـ / كاتب على قد حاله ، من مواليد ١٩٣٣ م حاصل على ليسانس الشريعة والقانون من كلية الشريعة والقانون جامعة الأزهر بالقاهرة .
بدأ الكتابة منذ سنين صدر له :

- خطيئتي التي لا تغتفر (رواية) إلكترونيا .
 - دع الظلام يتحدث (قصة) إلكترونيا .
 - زواج تحت التهديد (رواية) إلكترونيا .
 - تذكر (قصة) إلكترونيا .
 - واهم (قصة) إلكترونيا . وفازت في مسابقة أكسجين لأحسن قصة ، ونشرت في المجلة الورقية .
 - ليلة الدخلة (قصة بالعامية) إلكترونيا .
 - شارك في العديد من الحفلات ، وقدم العديد من المقاطع الصوتية والانشيد الدينية .
- للتواصل مع الكاتب عبر صفحة الفيس بوك /

<https://www.facebook.com/Kateb.ala.ad.haloo>

البيدج الرسمية /

<https://www.facebook.com/KATebMAGnooon>

ساوند كلاود /

<https://soundcloud.com/user-225261351>

يوتيوب /

<https://www.youtube.com/channel/UCtSzOvzkplxngBITA4u96p1>

Kamda
تصميم الغلاف محمد عادل

، حسيت براحة غريبة جوايا
مكنتش مصدق إن جوازة صالونات زى ما بيقلوا هتكون كدة
، لقيت فيها حبيبتى اللي ياما حلفت إني مش هتجوز بعدها
لقيت فيها الصاحب ، ورفيق الدرب ، لقيت فيها الحنية والأمان
، إستغربت ، وقلت إن دة ممكن يكون بسبب بداية كل شيء
لكن تأكدت إن الموضوع مش كدة خالص

محمد سيد الأكرت، من مواليد ١٩٩٣
صدر له ثلاث روايات إلكترونية هم
دع الظلام يتحدث و زواج تحت التهديد وخطيئتي التي لا تغتفر
وتعتبر ليلة دخله العمل الرابع له

